

Turnos dalla festa scu victours



La delegaziun digls tiradours da pistola da Surses avant 41 onns, pronta pigl til tras Savognin, siva digl success tar la Festa da teir federala 1985.



Marscho è nia tras Savognin. Guido Camous scu bandirel, flanco dallas dus mattas d'onour Floriana Poltera (san.) e Ricarda Battaglia. Fotos MAD

Gion Nutegn Stgier/FMR

A Coira vignan eruias dumengia igls rètgs da teir. An concorrenza stattan er tiradours grischuns. Igl 1985, cura tgi la festa da teir naziunala ò er gia li a Coira, ò l'Uniun da pistolas Surses gudagnea l'occurrèza da secziuns.

Dumengia proxima vo a fegn la 59avla ediziun dalla Festa da teir federala a Coira. A parteir dallas 12.30 on li igls gronds finals dall'occurrèza naziunala. Eruias vignan an tschintg categorias igls rètgs da teir (varda box). Scu tar mintga festa da teir federala dattigl er ena concorrenza dallas uniuns u societads da teir. Chegl è per exaimpel er sto igl cass igl 1985 cura tgi la festa da teir federala ò gio gia li a Coira. Dalla parteida èn lò stos durant igls 26 deis 80 000 participants e participantas. Sen 300 meters stavan a disposiziun a tiradours e tiradouras 270 schabas electronicas.

Egn digls miglers clubs dalla Svizra Orientala

Er sa participo all'occurrèza da teir federala ò igl 1985 igl Club da pistolas Surses. Da chel taimp tutgiva chel tar egn digls pi fermes clubs dalla Svizra Orientala. Tranter igls commembers sa cattava l'egn u l'oter tiradour tg'è sto tar festas da teir regiunals e schizont cantunals segl podest. Alla festa da teir federala a Coira igl 1985 è igl Club da pistolas Surses sto cun ena delegaziun da radond 20 tiradours. Chels on alloura er tratg precis e bagn, schi bagn tg'ò tanschia da gudagner la concorrenza da secziun dalla 4. categoria.

Retschets dalla Musica instrumentala Savognin

Blers tiradours da chella delegaziun da pistolas da success èn gio morts e chels tgi veivan anc on tranter 75 ed 88 onns. Chegl èn per exaimpel Renzo Cavegn, Guido Camous e Meltger Poltera da Savognin. Guido Camous sa regorda cunzont agl grond bavagnaint a Savognin, cura tg'ins seia turno da Coira. Cun betg aveir l'Uniun da pistolas Surses ena schinumnada

standarta (bandiera), ins veva fatg diever dalla bandiera digl circuit. Guido Camous ò rachinto tgi la Musica instrumentala Savognin vegia retschet la delegaziun cun turnar da Coira scu victoura da secziun. Gudagnea veva la secziun ena litografia da Rudolf Mirer cun en motiv d'en catscheder tgi porta en tgamutsch. Chel maletg è anc avant mang. Aint igl Hotel Pianta è alloura stada la festa pigls victours, ena festa tg'ò cuizzo anc dei siva mesanotg.

Rètgs e reginas da teir

Dumengia proxima vo a fegn la Festa da teir federala a Coira. Chel de on li igls gronds finals dall'occurrèza naziunala. Eruias vignan an tschintg categorias igls rètgs da teir. Per neir aint igl final on igls participants e las participantas gia da trer ples stetgs. Tratg vign er aint igl final ena qualificaziun e siva da chella vignan cuagl sistem da cup eruias igls rètgs da teir. Sen la distanza da 300 meters teiran per categoria (A, D, E) mintgamai 45 tiradours 30 schozs. Siva da chels sa maseiran alloura igls otg miglers per erueir igl rètg da teir da mintga categoria. Er sen la distanza da 25 meters e 50 meters dattigl en rètg da teir. Sen la distanza da 300 meters ainten la categoria D (arma 57/03) è da supponer tgi Norbert Caviezel da Tumegl, el tg'è alla testa dalla rangaziun intermedia-ra, savess defender igl sies tetel da rètg da teir gudagnea igl 2021 tar la festa da teir federala a Lucerna. Bungas schanzas da davantar rètg da teir cun la pistola ò allou-

ra er Elmar Fallet da Müstair. Da batter ò el pero Hansruedi Götti, igl tiradour apenzelles tg'è alla testa dalla qualificaziun intermedia-ra avant igl Jauer. (fmr/gns)



Igl Jauer Elmar Fallet ò bungas schanzas da davantar rètg da teir cun la pistola.

Foto Gion Nutegn Stgier